

Elton L. Lioe-A-Tjam:

Ki dia lo bin un Encuesta Parlamentario riba e asunto di WEB-hedging

Tres luna a pasa despues cu tabatin e debate parlamentario riba e asunto di WEB-hedging y e unico cambio cu pueblo por a ripara, ta cu e director di WEB a wordo retira siman pasa. A pesar cu durante e debate parlamentario, hopi informacion cuestionabel a wordo presenta pa e 'consultants' cu a haci e investigacion breve riba e materia aki.

E minister encarga cu WEB, ing. Mike de Meza, a duna como argumentacion pa e retiro di e director:

1. Cu nan no tin confianza mas den e director;
2. Cu no tabatin transparencia den e maneho di WEB;
3. Cu WEB ta den un situacion financiero serio.

E splicacion cu e minister a duna riba e retiro di e director, no a trece mas claridad den e asunto di WEB-hedging. Awor mas cu nunca un Encuesta Parlamentario ta necesario pa trece claridad den e asunto aki, manera mi a sugeri caba riba 24 maart 2015.

E no ta un secreto publico cu e minister y e ex director tabata conoce otro for di e tempo cu nan tabata traha na e refineria. Ainda nos ta corda e potretnan unda tur hende tabata hari y brasa otro, ora nan tabata presenta varios proyectonan 'Green'. Awor e ta straño cu e director ta wordo retira pa falta di

confianza. Kico a conduci cu e confianza entre e dos amigonan a bay?

Unda exacto no tabatin transparencia? E director di WEB, ta raporta na WEB su hunta di comisionan. Nan riba nan turno ta raporta na e director di Utilities Aruba. E ultimo aki ta raporta na e hunta di supervision di Utilities Aruba. Y na final e hunta aki, ta raporta na e minister, cu alabes tambe ta wordo asisti pa su conseheronan y coordinadornan. Pero e no a caba ainda, tur decisionnan di e magnitud manera esun di WEB-hedging, ta wordo discuti den e consejo di minister. Pues ta eyan ta unda e ultimo decisionnan ta wordo discuti y tuma. Awor e ta keda straño y hasta dificil pa kere cu ningun hende tabata sa nada di e WEB-hedging pasobra ta e director di WEB so no tabata transparente. E director di WEB nunca por a mara e compania su so sin aprobacion di su supervisoran. Pues ken a faya of miho ken ta gana?

E argumento pa motibo cu WEB su situacion financiero ta deplorable, tambe ta keda cuestionabel. Tabata WEB su custumber pa publica tur aña su relato financiero. Dicipiente nan a stop di haci esaki aña pasa, net prome cu e contract di WEB-hedging a wordo firma. Algo hopi straño. Ta manera nan tabatin algo di sconde.

Durante e periodo prome, e



mesun 'consultants' cu a haci e investigacion breve riba e asunto di WEB-hedging, tambe tabata controla y aproba cada aña e relato financiero di WEB. E relatonan aki semper ta wordo manda pa e hunta di supervision y e accionista, pues pa e minister. Awor ningun di e hendenan aki den e cadena di supervision of e mesun 'consultants', no por a wak algo abnormal den e relatonan financiero? Nan no por a bati alarma na tempo riba e situacion financiero serio? Anto kico nan tabata haci durante e tempo cu WEB su situacion financiero tabata birando critico?

By the way, e no ta un conflicto di interes cu e mesun compania di accountant cu ta

controla e relato financiero anual di WEB, ta e mesun cu a haci e investigacion di WEB-hedging?

Cu e retiro di e director di WEB, ainda e preguntanan principal den e asunto di WEB-hedging no a keda contesta. Algun di nan:

1. E prijs mundial di crudo tabata baha for di februari aña pasa, y tur indicacionnan tabata muestra cu esey lo a sigui. Anto dicon a 'hedge' pa un prijs hopi mas halto?
2. Di ken e consejo of e instruccion aki a bin?
3. Dicon a cambia e maneho asina radical pa 'hedge' un porcentahe mas halto?
4. Dicon a 'hedge' pa un periodo asina largo, mientras cu ningun hende tin un

bola di cristal pa mira den e futuro?

5. Aplicando e practicanan di 'good governance' y transparencia, dicon ainda henter e cadena di supervision ta den funcion, mientras cu e ta obvio cu nan tambe ta carga culpabilidad den e asunto di WEB-hedging?

6. Ta e asunto di WEB-hedging so a debilita e situacion financiero di WEB, of tambe tin otro proyectonan megalomania cu a contribui na e deterioro, manera por wordo lesa riba e website di 'The Report Company' (<http://www.the-report.net/aruba/utilities-jun2014/952-interview-dr-frank-hoevertsz-managing-director-of-utilities-aruba>). Aki e

compania madre di WEB, Utilities Aruba N.V., ta sponsor 10 pagina pa haci promocion personal?

Cu e retiro di e director di WEB, awor e momento ta oportuno pa cuminsa un Encuesta Parlamentario of scucha e ex director bou huramento pa sa exacto kico a pasa den WEB. E no por ta asina cu den pasado un Encuesta Parlamentario a wordo organisa pa un suma hopi mas chikito, mientras pa un suma di alrededor di AWG. 300 miyon, tur cos ta termina den un 'doofpot' y cu tur hende ta sigui den funcion. Mester bin claridad den e asunto di WEB-hedging awor.

Te un otro oportunidad! □